



Corina Casanova, chanceliera federala, survegn il premi SRG.R.

MAD

Premi SRG.R a Corina Casanova

■ (cp) **Corina Casanova, chanceliera federala, vegn undrada cun il premi 2015 SRG.R. Quai ha decis la supranza da la SRG.R unanimamain a sia ultima sesida. Corina Casanova s'engascha sin il nivel da l'administraziun federala cun persvasiun e perseveranza per la Svizra quadrilingua e la visibilitad da la lingua rumantscha.** A mintg'ocasiun uffiziala e privata trametta *Corina Casanova* in messadi sur da la quarta lingua, che quai saja al parlament, a l'executiva, a collavuraturas e

collavuratur da l'administraziun federala u en occasiun da ses blers contacts cun represchentant(a)s da l'ester. Questa tenuta che franca e metta segns per il rumantsch en Svizra e sur cunfins vul la SRG.R renconuscher. La surdada dal premi ha lieu ils 29 da matg 2015 a Turitg en il rom da la radunanza generala da la SRG.R.

Corina Casanova (1956) è creschida si a Ruschein e Tarasp. Suenten il studi da giurisprudenza ha ella lavurà sco advocata a Cuir ensemen cun *Giusep Nay*, an-

teriu president dal tribunal federal, e suenter intgins onns sco delegada dal Comité internaziunal da la Crusch cotschna en l'Africa ed en l'America dal sid. En l'administraziun federala è Corina Casanova stada tranter auter collavuratura dals servetschs dal parlament. Ella è era stada collavuratura persunala dals anteriurs cussegliers federals *Flavio Cotti* e *Joseph Deiss* e secretaria generala agiunta dal Departament federal d'affars exteriurs. Dapi il 2008 è Corina Casanova chanceliera federala.